

Här Fernand Etgen
President vun der Deputéiertechamber
19, um Krautmaart
L-1728 Lëtzebuerg

Tratten, den 8. Februar 2021

Här President,

sou wéi d'Chambersreglement et virgesäit, bieden ech lech, dës **dréngend** parlamentaresch Fro un den Här Minister fir sozial Sécherheet an un d'Madamm Gesondheitsminister weiderzeleeden.

Viru ronn zwee Joerzénge gouf am Ettelbrécker Spidol (Centre hospitalier du Nord – CHdN) e «service mobile» fir d'Palliativbetreierung agefouert. Eng ronn siwen Infirmierë schaffen aktuell an deem Service fir d'Wuel vum Patient, deen eng palliativ Betreierung brauch. De «service mobile» fir d'Palliativmedezin bitt eng sëllege Virdeeler:

- Déi erfueren Infirmieren, déi dëse Service assuréieren, sinn dauernd a Kontakt mat den Onkologe vum Ettelbrécker Spidol. Si kënnen an deem Kontext séier an onkomplizéiert op d'Bedürfnisser vum Patient agoen. Dëst huet de grouse Virdeel, datt dem Patient esou séier wéi méiglech gehollef gëtt an dësen net onnéideg waarden, respektiv, leide muss.
- Déi erfueren Infirmieren, déi dëse Service assuréieren, hunn eng mobil Apdikt dobäi a kënnen an der Reegel de Patient mat de néidege Medikamenter traitéieren. Dozou gehéiert ë.a. och d'Upasse vun de Medikamenter a Baxteren, virun allem am Hibleck op d'Schmärerztherapie oder awer wann et ëm d'Ernierung vum Patient geet, deen d'lessen net méi selwer kann zou sech huelen.
- Déi erfueren Infirmieren, déi dëse Service assuréieren, bauen e Vertrauensverhältnes zum Patient op. An der Reegel fiert ëmmer déi nämmecht/dee nämmechten Infirmier bei déi betrafte Famill. D'Infirmiere kennen also d'Krankheetsgeschichte vum Patient, dem Patient säi familiäert Ëmfeld a seng Suergen an Doleancen.
- Duerch d'Kompetenz vun den Infirmieren an hiren direkten Drot zu de Palliativmedeziner am Ettelbrécker Spidol kann a ville Fäll séchergestallt ginn, datt de Patient – sou wéi hien sech dat wënscht – esou laang wéi méiglech doheem versuergt ka ginn an a ville Fäll och doheem, am gewinnten Ëmfeld, senge Léifsten Äddi soe kann.
- Palliativpatienten, déi ab engem gewësse Moment leider net méi doheem versuergt kënnen ginn a mussen an d'Klinick goen, hunn de Virdeel, datt si dee Moment am Spidol betreit gi vun den Infirmieren, déi si scho vun doheem aus kennen. Dëst schaaft eng méi familiär Atmosphär, wat grad fir Patienten, déi um Enn vun hirem Liewen ukomm sinn, onbedéngt wichteg ass.

Den zoustännegen Infirmieren aus dem Ettelbrécker Spidol ass viru ronn dräi Deeg matgedeelt ginn, datt de «service mobile» fir d'Palliativmedezin mam Datum vum 1. Mäerz soll ofgeschaaft ginn a just nach déi ambulante Fleegedéngschter dës Service sollen assuréieren. Mir ass an deem Kontext vun de concernéierten Acteuren um Terrain zougedroe ginn, datt dëst mat sëllege Nodeeler, an éischer Linn fir de Patient (!), verbonne wäert sinn:

- De Patient, deen eng palliativ Betreieung brauch, muss onnéideg laang op en Traitement waarden, well den ambulante Fleegedéngscht net op déi selwecht Manéier ausgestatt ass (mobil Apdikt), fir dem Patient direkt den néidegen Traitement zoukommen ze loossen. De Patient muss an deem Fall dacks onnéideg laang leiden.
- D'Infirmiere vum ambulante Fleegedéngscht hunn net den direkten Drot zu den Onkologen a Palliativmedeziner a kënnen domat net esou séier an onkomplizéiert reagéieren, respektiv, den Traitement assuréieren, ewéi d'Infirmiere vum «service mobile» aus dem Ettelbrécker Spidol.
- Fir iwwerhaupt adequat reagéieren ze kënnen, mussen d'Infirmiere vun den ambulanten Fleegedéngschter fir den Traitement vum Patient ganz dacks eng Ordonnance médical ufroen, respektiv, d'Ambulanz ruffen. Dëst ass mat onnéidege Waardezäite fir de Patient verbonnen a verursaacht iwwerdeems onnéideg Käschten.
- Déi ambulante Fleegedéngschter mussen sech elo schonns ganz dacks mat de Infirmierë vum «service mobile» aus dem Ettelbrécker Spidol koordinéieren, well si dacks iwwerfuert sinn, wat de richtegen Traitement vum Palliativpatient ugeet.
- Et ass fir d'Palliativpatienten onméiglech, e perséinlechen Drot zu den Infirmieren vun den ambulante Fleegedéngschter opzemaachen well bei den ambulante Fleegedéngschter meeschtens ëmmer aner Infirmieren an d'Haus kommen, fir de Patient ze betreien. Deemno kennen si dat familiäert Ëmfeld, d'Krankheetsgeschicht an d'Doleance vum Patient manner gutt a kennen net esou op d'Doleance vum Patient agoen, wéi dat eigentlech misst sinn.

An deem Kontext hätt ech folgend Froen un d'Regierung:

1. Vu wéi engen Autoritéiten ass d'Decisioun ausgaangen, fir de palliative «service mobile» vum Ettelbrécker Spidol opzeléisen?
2. Wéini gouf d'Ettelbrécker Spidol iwwert dës Decisioun informéiert?
3. Aus wéi engem Grond gouf dës Decisioun geholl an ass d'Regierung sech de sëllegen uewe genannten Nodeeler bewosst, déi dat fir de Palliativpatient mat sech bréngt?
4. Gedenkt d'Regierung elo dréngend déi néideg Schrëtt ze ënnerhuelen, fir datt de palliative «service mobile» vum Ettelbrécker Spidol weiderhi kann assuréiert ginn?
5. Wa jo, wéi eng konkret Schrëtt ënnerhëlt d'Regierung elo, fir ze verhënneren, datt dës «service mobile» opgeléist gëtt?

Mat déiwem Respekt,



Jeff Engelen
Deputéierten